

SCRIPT OF EVENING GOJRI NEWS BULLETIN 19MAY 2026  
1700HRS

اوننگ گوجری نیوز بولٹن 19 مئی 2026

\*\*\*\*\*

یوہ آکاشوانی جموں ہے نصرت تے اظہر حسین تیں خبر سُنو۔

\*\*\*\*\*

HEADLINES

- ۱۔ بھارتی ریلوے غی جانب تیں جموں ویشنو دیوی کٹڑا ریلوے سیکشن ور 238 کروڑ روپیہ گا حفاظتی منصوبہ غی منظوری دتی ہے مرکزی وزیر اشونی ویشنو غو طویل مدتی حفاظت تے بہتر سفری نظام ور زور۔
- ۲۔ لیفٹیننٹ گورنر منوج سنہا غی پلوامہ مانہ نشہ مُکت جموں کشمیر مہم مانہ شرکت ، نوجوان نسل نانہ منشیات تیں بچان واسطے نشہ آور دہشت گردی غا نیٹ ورک نانہ ختم کرن ور زور دتو ہے۔
- ۳۔ وزیر اعلیٰ غا مشیر ناصر اسلم وانی غی جانب تیں جموں سمارٹ سٹی منصوبیاں گو جائیزو، امرناتھ یاترا تیں پہلاں تمام اہم پروجیکٹ جلد مکمل کرن غی ہدایت۔
- ۴۔ چیف سیکرٹری اٹل ڈلو غو مچیل ماتا یاترا غا پُرامن تے مضبوط انعقاد واسطے وسیع انتظامات غو جائیزو تے زائرین غی سہولت تے حفاظت نانہ یقینی بنان ور زور۔
- ۵۔ محکمہ موسمیات غی طرفوں جموں کشمیر مانہ آئیندہ 3 دنوں تک ہلکی بارش گرج چمک تے تیز ہوا غی پیش گوئی کی ہے۔

\*\*\*\*\*

RAILWAYS KATRA SECTION

بھارتی ریلوے نے جموں مانہ شری ماتا ویشنو دیوی کٹڑا ریلوے سیکشن ور اہم حفاظتی تے مرمتی کماں غی منظوری دے دتی ہے ، جس ور 238 کروڑ روپیہ خرچ کیا جیں گا۔ اس منصوبہ مانہ پہاڑی ڈھلواناں نانہ مضبوط بنانو، سرنگاں غی مرمت ، پُلاں غو تحفظ تے حساس مقامات ور سرنگاں مانہ پانی رسن غا مسئلہ نانہ حل کرنو شامل ہے۔ مرکزی وزیر ریلوے اشونی ویشنو نے کہیو کہ یہ اقدامات تفصیلی جائیزہ تیں بعد کیا جارہیا ہیں تے یہ مشکل علاقوں مانہ محفوظ تے قابل اعتماد رابطہ واسطے حکومت غا عزم نانہ ظاہر کرے۔ انہاں نے مزید کہیو کہ ان کماں تیں اس اہم ریلوے سیکشن غی طویل مدتی حفاظت تے کارکردگی مزید مضبوط وے غی۔

\*\*\*\*\*

LG NASHA UKT

لیفٹیننٹ گورنر منوج سنہا ، اج جموں کشمیر نشہ مُکت ابھیان غے تحت پلوامہ مانہ منشیات غے خلاف عوامی مہم مانہ شامل ہوا۔ اس موقع ور لوکاں تیں خطاب کرتا واں انہاں نے منشیات غی بدت غے خلاف آخری تے فیصلہ کُن لڑائی لڑن غی اپیل کی۔ انہاں نے کہیو کہ نوجوان نسل نانہ نشہ غی لت تیں بچان واسطے منشیات تے دہشت گردی غے گٹھ جوڑ نانہ ختم کرنو بے حد ضروری ہے۔ انہاں نے مزید کہیو کہ گزشتہ ایک مہینہ غے دوران جموں کشمیر مانہ عوامی بیداری

مانہہ نمایا اضافو دیکھن نانہہ لبو ہے۔ بارہمولہ مانہہ ہزاراں لوکاں نے منشیات  
غے خلاف آواز بُلند کی، جد کہ جموں، سامبہ، ادھمپور، کٹھوعہ، سرینگر تے  
دیگر ضلع مانہہ وی نوجواناں تے والدین نے اس مہم مانہہ بڑھ چڑھ غے حصو  
لیو۔ انہاں نے مزید اس طرح کہیو-----  
\*\*\*\*\*

## ADVISOR SMART CITY

وزیر اعلیٰ غا مشیر ناصر اسلم وانی نے اج جموں سمارٹ سٹی لمٹیڈ غے تحت  
جاری اہم ترقیاتی منصوباں گو جائیزو لیو تے آن آلی امرناتھ یاترا تیں پہلاں تمام  
بڑا منصوباں نانہہ وقت وں مکمل کرن وں زور دتو۔ مشیر نے سب تیں پہلاں فیم  
ٹو منصوبہ غے تحت تیار کیا جارہیا ٹاٹا ای بس ڈیپوٹ غو دورو کیو تے پی۔ایم  
ای بس خدمات پروجیکٹ تیں متعلق جاری کماں غو معائنو کیو۔ انہاں نے ویسٹ  
ٹو ونڈر پارک غو وی دورو کیو، جت ری سائیکل شدہ مواد تیں 14 مشہور  
یادگاراں غی نقل تیار کی جارہی ہے۔ انہاں نے فنکاراں غی تخلیقی صلاحیت غی  
تعریف کی۔ 11 کروڑ روپیہ غی لاگت تیں بنن آلو یوہ پارک تقریباً 80 فی صد مکمل  
ہو چکو ہے تے اس غو مقصد جموں مانہہ سیاحت، ماحولیاتی بیداری تے عوامی  
تفریح نانہہ فروغ دینو ہے۔  
\*\*\*\*\*

## ANTI ENCROACHMENT DRIVE

جموں کشمیر مانہہ غیر قانونی قبضاں غے خلاف مہم اج وی جاری رہی، جس  
غے تحت جموں گا سدھڑا علاقہ مانہہ غیر قانونی تعمیرات توڑن غی کاروائی انجام  
دتی گئی۔ مارا ضلع نامہ نگار غے مطابق، اس کاروائی غے دوران 20 تیں متہ  
غیر قانونی پکا تے عارضی ڈھانچہ نانہہ ٹایو گیو، جد کہ کروڑاں روپیہ غی  
مالیت غی 12 کنال تیں متو قبضہ شدہ زمین واگزار کرائی گئی۔ کاروائی غے دوران  
خواتین پولیس اہلکاراں سمیت بھاری تعداد مانہہ پولیس اہلکار تعینات رہیا تانجے  
پورو عمل پُر امن طریقہ تیں مکمل وے۔ حکام نے دسیو کہ کاروائی شروع ہون  
تیں پہلاں رہائشیاں نانہہ جگہ خالی کرن غی ہدایت دی گئی تھی۔ پیش ہے اس  
بارا مانہہ مارا ضلع نمائندہ غی یاہ رپوٹ-----  
\*\*\*\*\*

## FUEL HIKE

پیٹرول تے ڈیزل غی قیمتاں مانہہ اج تقریباً 90 پیسہ فی لیٹر گو اضافو کیو گیو ہے  
جہیڑو ایک ہفتہ تیں وی کہٹ عرصہ مانہہ دوجو اضافو ہے۔ تازہ ترین اضافو 15  
مئی نانہہ 3 روپیہ فی لیٹر غو کیو گیو تھو، جہیڑو چار سال تیں زیادہ عرصہ بعد  
ایندھن غی قیمتاں مانہہ پہلی تبدیلی تھی۔ یوہ اضافو ایران تنازعہ تے آبنائے ہرمز  
مانہہ رُکاوٹاں غے باعث عالمی سطح وں خام تیل غی قیمتاں مانہہ تیز اضافہ تیں  
بعد باندھے آيو ہے۔  
\*\*\*\*\*

## CS MACHAIL YATRA

چیف سیکرٹری اٹل ٹلو نے اج ایک اعلیٰ سطحی اجلاس غی صدارت کی، جس  
مانہہ اس سال اگست مانہہ شروع ہون آلی سالانہ مچیل ماتا یاترا غا پُران، محفوظ  
تے آسان انعقاد واسطے ڈویژنل تے ضلعی انتظامیہ غی جانب تیں کیا جارہیا

انتظامات غو جائیزو لیو گیو۔ اجلاس غے دوران چیف سیکرٹری نے گزشتہ سال یاترا رستہ ور پیش آیا حادثہ تیں بعد جاری کی گئی ہدایات ور عمل درآمد غو وی جائیزو لیو۔ انہاں نے آن لائن تے آر۔ایف۔آئی۔ڈی ور مبنی اندراج غو نظام، قدرتی آفات تیں بچاؤ غا اقدامات، خودکار بارش ناپن آلا آلات، خود کار موسمی سٹیشن تے تفصیلی طے شدہ حفاظتی اصول، سمیت بکھ بکھ حفاظتی اقدامات گو تفصیلی معائنو کیو، تانجے یاترا غے دوران زائرین غی محفوظ تے آسان آمدرفت نانہہ یقینی بنايو جاسکے۔

\*\*\*\*\*

## RAMBAN ROAD ACCIDENT

رام بن ضلع مانہہ اج ایک افسوس ناک سڑک حادثہ مانہہ گول سنگلدان سڑک ور سنگلدان غے قریب ایک مسافر بس الٹ گئی، جس غا نتیجہ مانہہ کم از کم ایک شخص غی موت ہوگئی، جد کہ 15 تیں 16 افراد زخمی ہوا ہیں۔ مارا ضلعی نامہ نگار غے مطابق، بس گول غا دھرم علاقہ تیں جموں جا رئی تھی کہ ڈرائیور غا مبینہ طور ور گڈی ور قابو کھون غے باعث یوہ حادثو پیش آیو ہے۔ مقامی لوک، پولیس تے ٹریفک اہلکار فوراً موقع ور پُج گیا تے بچاؤ کاروائی شروع کیں۔ زخمیاں نانہہ قریبی اسپتالاں مانہہ منتقل کیو گیو، جد کہ حکام نے حادثہ غی تحقیقات شروع کردتی ہے تے متاثرین نانہہ ہر ممکن مدد فراہم کی جارئی ہے پیش ہے اس بارے مارا نمائندہ غی یاہ رپوٹ۔-----

\*\*\*\*\*

## PROG ANN

علاقائی خبراں آلو شعبو آکاشوانی جموں 21 مئی 2026 نانہہ دہشت گردی غے خلاف تہاڑہ گا موقعہ ور 25 منٹ گو ایک خصوصی پروگرام نشر کر رہیو ہے۔ اس خصوصی پروگرام گو موضوع اتحاد، امن تے دہشت گردی غے خلاف صفر برادشت رکھیو گیو ہے۔ اس خصوصی پروگرام مانہہ مارا مہمان وین گا برگیڈیر ریٹائرڈ راجن جموال جھیڑا اس موضوع ور اپنی ماہرانہ رائے پیش کریں گا۔ اس پروگرام غی میزبانی مارا انکر جگموہن شرما کریں گاپیش ہے پروگرام غی ایک جھلک۔-----

\*\*\*\*\*

## MOTOR VEHICLES DODA

گڈیاں لاریاں بارے محکمہ ڈوڈہ نے سٹیکرز غا غلط استعمال تے ذاتی گڈیاں ور غیر مجاز نشانات خاص طور ور ان گڈیاں ور جھیڑا فوج یا پولیس غو ناں دس رہیا ہیں غے خلاف سخت مہم شروع کی ہے۔ اسٹینٹ آرٹی۔او کپل دیو نے کہیو کہ خلاف ورزی کرن آلاں نانہہ موٹر ویکل ایکٹ غی دفعہ 177 غے تحت سزا دتی جے غی۔ انہاں نے زیادہ کرایو یا زیادہ سواری بارے عوام نانہہ تعاون تے اطلاع دین بارے زور دتو۔ سڑک غی حفاظت ور لوہ کھلتاں واں انہاں نے نشہ مُکت مہم غے تحت بھدرواہ مانہہ ایک حالیہ بائیک ریلی غا بارہ مانہہ گل بات کی۔ جس مانہہ منشیات غا استعمال غا بارہ مانہہ بیداری نانہہ فروغ دتو گیو تے ڈرائیوراں نانہہ صحت مند تے منشیات تیں پاک رہن غی ترغیب دتی۔ آکاشوانی غا خبراں آلاں شعبہ سنگ گل کرتا واں اسٹینٹ آرٹی۔او کپل دیو نے اس طرح کہیو۔-----

\*\*\*\*\*

## WEATHER

محکمہ موسمیات نے آج تین جموں کشمیر ماہہ بارش گرج چمک تے تیز ہوا غی پیشن گوئی کی ہے۔ آکاشوانی جموں گا نمائندہ نے خبر دتی ہے کہ آج تین 21 مئی توڑی کشمیر تے جموں خطہ ماہہ چند مقامات ور تہاڑی تے شام ویلے آسامن جُز وی طور ور ابرآلود رے غو تے ہلکی بارش گرج چمک غے نال اناس تے آندھی وین غی تاہم 22 تین 25 توڑی عام طور ور موسم خشک رہن غی توقع ہے۔

\*\*\*\*\*

## POONCH LABOUR DEPT

ضلع انتظامیہ پونچھ نے محکمہ محنت غا اشتراک تین ضلع بھر ماہہ نُکڑ بیداری پروگراماں گو آغاز کیو تانجے ریڈھی لان آلا تے غیر منظم شعبہ تین وابستہ مزدوراں نانہہ پردھان منتری شرم یوگی مان دھن سکیم غا بارا ماہہ آگاہ کیو جاسکے۔ اسٹینٹ لیبر کمشنر محمد عارف نے کہیو کہ یہ رضاکارانہ پنشن سکیم چھوٹا تے غریب مزدوراں نانہہ مالی تحفظ فراہم کرے تے 60 سال غی عمر تین بعد ماہانہ پنشن غی ضمانت دے۔ افسراں نے عوام ماہہ بیداری مواد تقسیم کیو ، لوکاں تین گل بات کی تے سکیم ماہہ اندراج کرن غی ترغیب دی۔ آکاشوانی غا خبراں آلا شعوبہ سنگ گل کرتا واں اسٹینٹ لیبر کمشنر پونچھ محمد آرف نے اس طرح کہیو-----

\*\*\*\*\*